

va a san Zuane — la del Spisier — in Gaian, là dei Sori, poi a la Madona de Guzan e de là i va a santa Margareita. A santa Margareita i marena a turnà: chi vuvi, chi lonbo de porco, chei furmajo, chi presouto e cusei duoti i magna e i bivo vein bianco e nigro, e i preti douti aligri i sta in bona armoneia dui ure e poi i ven vî dicendo al rusario. Cusei i ven a san Fransisco a cantando litaneie de i santi e i turna in cisa, al domo.

Al preimo dèi le fimine le va s'cite, le no se meto tanta roba. Al segundo dei inseina fa marena i va douti in ciza: i liva la pursision e i va consadi in beina a san Giacomo. Là zì la misa, poi i va a san Martein e feinta che i deis la segunda misa douti i va a bivi al cafè a casa soia; i se ciò la sachita piena de pan, de vein, lonbo e vuvi coti e cusei i turna a san Martein. I se meto in beina e i va a santa Cruso e da là i va a santa Lusèia. Là i prega e despò i turna vî e i va a san Chirèin. Là i nu sta purasè: i magna dui bucade a la svelta e poi i va a Guràn. A Guràn zì la misa. Fineida i se meto a zazi, i teira fora de la sachita al cumpanadigo, al pan e al vèin, i magna e i se zibeiso oun cun l'altro al da magnà. Despoi magnà e bivou, al vein ghe fa sircolo, e i canta, omi e fimine e muredi douti in cumpagneia. I preti i va a vidi sti busoli, i sirca al goto e i reido anche luri. A Guràn i sta dui trî ure poi i liva soun le bandiere e douti i se consa in beina a dui a dui: preima i muredi, poi i omi, poi i preti e dreio le fimine. La feila zì longa; i fioi i canta: "Te rugâmo zandi nos" 13), i preti canta le litaneie grande e le fimine che le zì a largo le dei al ruzario sule. E dacusei a se reiva al domo.

Ancui le zì mejo visteide de jeri, le fimene, parchì le pasa per Calnova.

Al terso dei sona la miteina a le cinque, chè la zento se liva e vaga in ciza. I sona turnà par levà le bandiere e i se consa in beina douti. I nu se ciò gneinte cun luri.

Tanti fioi cà zì l'oultimo dèi parchì i nu va a lonzi! I va a la Madona Traversa, ca zì poco vî vî da Dignan; i deis la misa là e poi i turna a levà le Rugasion e i va a santa Dumeniga; i prega un po' e poi i va al Capitel e despoi a sant'Antonio. Là i deis la misa cantada e le litaneie grande, Cu zì furnei, a vidi chi zì là! douti partera peici e grandi su quil prà. La tola de i preti in mezzo. Doute le fimene le curo a purtaghe la marena a i soi: chei puveina, chei fritada, chei cafè, chei salamo, ma l'agnel freito e al vein de Rusa pasa batalgia! Fra tanta zento zì chi vardà là! Despoi ch'i jo' magnà i fa la cantada. Poi i preti i liva le bandiere e i fioi preimi, feisi i seiga,